

**Kalaallit Nunaanni pinerluttulerinermi inatsisip allanngortinneqarnera pillugu inatsisip
(Killilikkamik piffissaligaasumik inissiisarfimmi inissiinermi piffissap
sivisunerpaaffissaata qaffanneqarnera) Kalaallit Nunaanni Namminersorlutik
Oqartussanit akuersissutigineqarnissaa pillugu Inatsisartut aalajangiiffigisassaattut
siunnersuut**

*Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut
Naligiissitaanermullu Naalakkersuisumit saqqummiunneqartoq*

pillugu

Inatsisinut Ataatsimiititaliap

siunnersuutip aappassaaneerneqarneranut

ISUMALIUTISSIISSUTAA

Ataatsimiititaliap suliarinninnermini ilaasortarai:

Inatsisartunut ilaasortaq Aqqalu C. Jerimiassen, Atassut, siulittaasoq
Inatsisartunut ilaasortaq Kuno Fencker, Naleraq, siulittaasup tullia
Inatsisartunut ilaasortaq Pipaluk Olsen, Demokraatit
Inatsisartunut ilaasortaq Iddimanngiiu Jensen Bianco, Inuit Ataqtigiit
Inatsisartunut ilaasortaq Anders Olsen, Siumut

UKA2025-mi ulloq 25. septemberimi siullermeerinninnerup kingorna ataatsimiititaliap
siunnersuut misissorpaa.

Siunnersuutip imarisaa siunertaalu

Pinerluttulerinermi inatsimmi § 147-mi pineqaatissiisarnermut killiliussap ukiunit 10-nit
ukiunut 16-inut qaffanneqarluni Kalaallit Nunaanni pinerluttulerinermi inatsisip
allanngortinneqarnissaa siunnersuummi siunertarineqarpoq. Taamaalilluni siunnersuut
akuerineqassappat killilikkamik piffissaligaasumik inissiisarfimmi inissiinermi piffissap
sivisunerpaaffissaa siunissami ukiunik 16-inik sivisussuseqassaaq.

Taamaalilluni pingaartumik inunnut navianaatilimmik pinerluttuliornerit ilungersunarnerpaat,
assersuutigalugu kinguaassiuutitigut pinerluttuliornerit ilungersunarnerpaat
toqutsinerilluunniit pineqartillugit killilikkamik piffissaligaasumik
inissiisarfimmiittussanngortitsinerit sivisussusilerniarnerini assigiinngisitaarnerusumik

piffissaliinissamut eqqartuussiviit inatsisissatut siunnersuutikkut ammaanqassapput. Taamaattorli pingaarnertut malittarisassaq malillugu eqqartuussiviit ullumikkut sivilissutit assinginiq sivilissusilerlugit inissiisarfimmiittussanngortitsisarnissaat siunnersuummi naatsorsuutigineqarpoq.

Siunnersuutip Inatsisartunit siullermeerneqarnera

Aalajangiiffigisassatut siunnersuut siullermeerneqarami taparserneqarluarpoq.

Inuiaqatigiinnili ineriartornermut, tassungalu ilanngullugu innuttaasut eqqartuussiveqarnermut tatiginninnerannut kiisalu innuttaasut inatsisitigut naapertuilluartoqarneranik misiginerunissaannut naapertuuttunngortillugu eqqartuussiveqarnerup ineriartortinneqarnissaanik ataatsimut isigalugu kissaatigineqartoqartoq oqallittoqarnerani malunnarpoq. Matumani ”pineqaatissiissut” pinnagu ”pillaatissiissut” atorneqartariaqalernersoq ilaatigut oqallisigineqarpoq.

Taamatuttaaq pinerluttuliornerit sorliit sukaterinermut ilaatinneqassanersut tamannalu inatsisissatut siunnersuummi erseqqissarneqassanersoq oqallisigineqarpoq.

Siunnersuutip aningaasaqarnikkut kingunerisassai

Aalajangiiffigisassatut siunnersuutit piviusunngortinneqarneranni aningaasaqarnikkut allaffis-sornikkullu kingunerisassat siunnersuutip tunngavilersuutitaani nassuiaatigineqartassat Inatsisartut suleriaasianni § 33, imm. 1-imi allassimavoq.

Tamanna naapertorlugu pisortanut namminersorlutillu inuussutissarsiutilinnut innuttaasunulluunniit aningaasaqarnikkut kinguneqassanngitsoq siunnersuummi allaqqammat ataatsimiititaliamit maluginiarneqarpoq.

Ataatsimiititaliap siunnersuummut oqaaseqaatai

Inatsisip ullutsinnut qaqukkulluunniit naleqquttuunissaa inuiaqatigiinnilu pisariaqartitanut ineriartornermullu naapertuuttuunissaa pingaaruteqartoq ataatsimiititaliaq isumaqarpoq.

Taamaattumik eqqartuussiveqarnitta sukumiisumik iluarsartuuteqqinneqarnissaa pisariaqartinneqarnerisat ataatsimiititaliamit oqaluuserineqarpoq.

Pinerluttulerinermi inatsimmi § 121, imm. 1 naapertorlugu ima allassimasoqartoq ataatsimiititaliamit maluginiarneqarpoq, tassalu pineqaatissiissummik toqqaanermi uuttuinnermilu eqqarsaatigineqassat 1) inatsisinik unioqqutitsinerup peqqarniissusia, matumani ilanngunneqassalluni iluutsit taamatut ittut akiornissaannut inuiaqatigiit soqutiginninnerat, aamma 2) pinerluuteqarsimasup inuttut atugai, matumani ilanngunneqassalluni pineqartup inatsisinik unioqqutitseqqinnissaa pinaveersaartinniarlugu

pisariaqarsorineqartut. Allatut oqaatigalugu inatsisinik unioqqutitsinerup peqqarniissusia (iliuutsit tunngaviat) pinerluuteqartullu inuttut atugai (pinerluttuliortup tunngavigineqarnera) assigiimmik naleqartillugit isiginiarneqarnissaat pingaartinneqarpoq.

Ataatsimiititaliamittaaq maluginiarneqarpoq pinerluttuliornerni ataasiakkaani pineqaatissiissutip annertussusianik ataatsimut isigalugu qaffaanissaq pineqaatissiinermulluunniit killissarititanik atuutsitsilernissaq siunnersuummi kissaatigineqanngitsoq. Taamaalillunilu pinerluttuliornernit aalajangersimasut sorliit piffissami killilikkami pineqaatissinneqarsimasunut inissiisarfimmiinnerup qaffanneqarnerani tassani ilaatinneqarnersut erseqqissaatigineqanngilaq, tamannalu eqqartuussiveqarnerup maannamut aaqqissugaaneranut aamma naapertuuppoq.

Taamatuttaaq inatsimmi qaffaaneq pinerluttuliornernut aalajangersimasunut killilerlugu atuutsinneqassanersoq isumaliutigineqarsimasoq siunnersuummut piareersaatini allassimavoq. Tamatumani nalilerneqarpoq tamatuma pinerluttulerinermi inatsimmi pineqaatisseeriaaseq pisariaqanngitsumik pisariunerulersissagaa, tamatumalu saniatigut pineqaatissiinermut killiliussanik ilaannakortumik atuutsitsilernertut aamma paasineqarsinnaassalluni. Taamatuttaaq immikkut paarisassanngortitsineq, pinerluttuliornernut aalajangersimasunut atorneqartussatut killilerneqartoq minillugu, pineqaatissiinerup suugaluartulluunniit pinerluttulerinermi inatsimmik unioqqutitsinermi tunngaviusumik atorneqarsinnaanera pingaartinneqarpoq.

Tamanna tunngavigalugu pinerluttuliornernit sorliit siunnersuummi ilaatinneqarnersut erseqqissaatigissallugu pisariaqanngitsoq ataatsimiititaliaq isumaqarpoq.

Ataatsimiititaliap inassuteqaatai

- Ataatsimiititaliap isumaqatigiittup aalajangiiffigisassatut siunnersuut akuerineqassasoq inassutigaa.
- Siunnersuutip siullermeerneqarnerani oqaluuserinninnermi pineqaatissiinermut killissarititanik atuutsitsilernissaq il.il. arlalinnit kissaatigineqartoq ataatsimiititaliamit maluginiarneqarpoq. Tamanna tunngavigalugu eqqartuussiveqarfimmik ineriartortitsinermik suliniuteqaqqinnissaminni isummat saqqummiunneqartut ilannguteqqullugit Naalakkersuisut ataatsimiititaliamit kaammattorneqarput.

Ataatsimiititaliap taama oqaaseqaateqarluni isumaliutissiisummilu allassimasutut paasinnil-
luni siunnersuut aappassaaniigassanngortippaa.

Aqqalu C. Jerimiassen
Siulittaasoq

Kuno Fencker
Siulittaasup tullia

Pipaluk Olsen

Iddimanngiiu Jensen Bianco

Anders Olsen